

39. ETASHOKI YESU TE SALABA

Luka. 23:26-56; Yohanna 19:16b-42; Matayo 27:27-61; Marko 15:16-47

Ore isikarini o Roma naa etara Yesu oleng' nepik sii olmarisian loo ilkiku elukunya enye pee esurdaany ninye. Newo osarge te nkomon o ti oriong'. Ore pee eidipa Pilato aishoo isikarini metoriko Yesu metashei, nearaki Yesu anap Osalaba lenye te inkoitoi e Yerusalem. Ore pee enauru oleng' pee meitoki aidim atanapa, nearaki likae tung'ani anap. Nepuo auluo mpaka endoinyo nataaniki Yerusalem.

Ore pee ebaiki ele doinyo, neshe ninche Yesu tenebo ilapurrok oare. Nepik isikarini ilkeek aare te nkop aikonji anaa esalaba nepik Yesu te dukuya ninche. Neen naa neudo sii inkaik o inkejek enye to lkeek too Imushumari. Neilepie msalaba shumata nepik te nkumoto meitashie. Neton isikarini te nkop neorikino inkilani lenyena, neoshie enkukuo pee etum oloya.

Ketii iltung'ana kumok aing'orita kuna baa. Netii inkituak naatusujutua Yesu. Netii sii ilapolosak o ilaiteng'etak oo inkitanapat. Negira aikordodisho nejo, "Eitajeuo ilkulikae nemeidim aitajeu kewan.

Nemor sii olapurroni obo Yesu kake etejo olikae, "Tigirayu amu ore iyiook kitaasa intorrok. Eishiakino pee kiye, kake eitu eas ele tung'ani entoki torrono." Neliki sii ninye Yesu, "Tadamuoki tinijing' enkitoria ino." Newaliki Yesu, "Esipa aajoki iyie, ata taata, ijing' Paradiso te nebo nanu."

Neaku saa ile enaipirie enkolong', nerip enaimin enkop pooki o metabaiki saa naaudo, neimis ewang'an e nkolong'. Ore Yesu, nebuaku to ltoilo sapuk, nejo, "Papa, inkaik inono apik enkiyang'et ai!" Nejo sii, "Eidipe! Ore pee ejo neijia nedung'o tau. Ore ena kata, neiperra nabo kata olkarasha le nkaji e Nkai aaku are, aiteru te shumata o metabaiki abori, neikirikira enkop nedanya ndapidapo. Ore ilo kitok loo sikarini oorripito Yesu o lelo ootii te nebo ninye, pee edol eikirikire enkop o kulie baa naatotiwuo, neureishoyu oleng' ejo, "Esipa Enkerai e Nkai ele tung'ani."

Ore too lkuaak lo Lyahudi, meing'uari seseni te shumata o salaba te nkolong' e sabato. Neomon Pilato metigili ninche inkejek neiwuang'ieki aaya. Neaku eetuo isikarini apa negil inkejek o ilapurrok pee esioki aaye. Kake ore pee epuonu enetii Yesu, nedol aajo eidipa atua, neitu egil inkejek enyena. Kake etaremo osikari obo ematua te remet, nepuku osarge o enkare.

Ore te siadi nena, neisho oloiteng'eni le Yesu olmeneng'ani lenye nepik atua enkurare ng'ejuk neton eitu ae kata eirragieki likae. Neiken to soito sapuk. Ore tenkaraki Sabato enkolong' nasuja, neirragie Yesu te ine.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Tia oitoi kiret iyie enkishui ino tenidamu arashu ining'u inchere etua Yesu to salaba te nkaraki iyie?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPARTA YESU? Kaji kinko pee kidol aajo ore Yesu naa Enkai?

- **Kaji eiko teneitodolu ena atini nchere keata Yesu enkidimata sapuk?** (engolon, enkitoria)
 - Neimisimisu oloing'ang'e tempolos endama, neikirikira enkop, nepolosa olkarasha lo lng'obor.
- **Kaji eiko teneitodolu ena atini nchere keyiolo Enkai (Yesu) pooki toki?**
 - Eibalunye Yesu keeye enye o ingolikinot enyena too nkatitin kumok.
 - Neiyiolou ajo kejing' ilapurok tenebo ninye Paradiso.
 - Nelimu iloibonok nchere ore Olaitajeunoni nemeata entioto arashu ing'ok, keikenakini atua ilaing'okok, keremi ninye tenkaraki ing'ok ang', nemeng'or kewan, neikoroji, neisilisili, neoshoki olkila lenye inkukuo.
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
 - Ore Yesu naa olasar bayaroti lemeata entioto arashu ing'ok, olasar oidim aiboi engoro e Nkai.
 - Anaa olkuo le kerr le Pasaka, nemegili iloik lenyena. Ore ninye naa olmonokie osipa too lasari pooki lo Lning'o Musana. Ore lelo asari nelimu aautu Yesu.
 - Nejo Yesu, "Eidipe!" Neidip Yesu etaa ninye olasar oyieunoyu pee eidip engoro enye neidimie pee eisho enyorrata ilaing'okok.
 - Nepolosa olkarasha le Nkaji Enkai. Neaku ore ewueji sinyati oo sinyat naa kebaikinoyu taata eimu Kristo tiatua keeya enye.
- **Kaji eiko teneitodolu ena atini nchere keata Enkai (Yesu) empiris? (enyorrata, neata olng'ur too laing'okok, esupatisho, neuro o ltungana)**
 - Etonyorayie Yesu inkisilililot pooki teng'iriatu pee eitajeu iyiook ilaing'okok. Nenotakini ninye, neikoroji, neari ninye, neitanapi osalaba, neoshokini ilmushumaani neilili ninye to salaba nedung'o tau tenkaraki iyiook.
 - Etonyorra Enkai enkop neishoru Enkerai enye nabo paa ore pooki ng'ai oiruk neimeimin kake netum enkishui nemeish.
 - Nepolosa olkarasha le Nkaji e Nkai katitin aare. Neaku kebaiki ilaing'okok ine Wueji Sinyati oo Sinyat ine netii entii Enkai.
- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaajo)**
 - Ore apa Yesu naa Olkuo le Kerr le Nkai oya ing'ok e nkop.
 - Olkuo le Kerr lemeata entioto nemeata eng'oki. Neitu egili iloik lenyena.
 - Eitabayie Yesu esiai e Nkaji e Nkai. Nepolosa olkarasha le Nkaji e Nkai katitin aare. Neaku kebaiki ilaing'okok ine Wueji Sinyati oo Sinyat ine netii entii Enkai. Eitabayie Yesu ilasari pooki!
 - Eitabaya Yesu intarasi ilasari pooki loo sarge lo Lnging'o Musani. Neutu ilasari pooki te dukuya Yesu Kristo o lasar lenye te msalaba.
 - Eitabaya enkisiligata oo loibonok. Te nkitanyaanyukoto:
 - Neremi ninye tenkaraki ing'ok ang' (Isaya 53:4-6)
 - Neari nenotakini. (isaya 50:6)
 - Etashoki tenebo ilaing'okok (Isaya 53:12)
 - Neremi inkaik o inkejek (Olkerempe le Nkai 22:16, Sakaria 2:10)
 - Neikoroji ninye. (Olkerempe le Nkai 22:6-8)
 - Neosh inkukuo tenkaraki olkila lenye. (Olkerempe le Nkai 22:18)
 - Eitabaya enkisiligata e Nkai tiatua Olchamba le Eden nchere kerriu Enkai Olaitajeunoni.

KAINYIOO KINTENG'ENA ENA ATINI NAIPARTA OSOTUA OLTUNG'ANI O ENKAI? (ENJEUNOTO)

- Ore oltung'ani naa olaing'okoni. Neata iltauja oogol negolong'aki Enkai. Neibaa Ilyahudi Yesu.

- o Lasima neiruk iltung'ana enetaasa Yesu te msalaba pee eitejeuo.
- o Lasima nisudori te siadi osarge lo lkuo le kerr mikintajeuo anaa iltung'ana le Israeli apa te Pasaka.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- Eidipe! Etaasa Yesu pooki toki nayieuni pee kitum enjeunoto aing'uaa ing'ok o keeya. Egira kimpot pee irridu nirruk. Indim atajeuo taata?
- Tenikintajeu nintukuo too ng'ok, amaa kaji eikunono enkishui ino? Ekiret pee kitum emboron niret ilkulikai aaiyiolou Olaitajeunoni?